

文獻叢編

二十六年第七輯

文獻題辭

二十六年四月

中華民國三十二年一月出版

文獻叢編第四十六輯

編輯 故宮博物院文獻館

出版發行 故宮博物院

印刷 北京和平門內文雅社



每冊定價二元

二十六年第七輯文獻叢編目錄

大明譜系空漆匣

照片

雲南獼猴圖力步圖

照片

會考府題奏檔

工科奏章文冊

奕詳等奏查明御書處列朝御筆及臣工所書石刻摺

典籍廳事宜單

蘇州織造李煦奏摺

續

謝命子一同回蘇摺

奏報母文氏爲孫返蘇望闕謝恩摺

奏報兩淮煎鹽情形摺

奏報雨水米價並所種御稻情形摺

奏報雨水米價並進晴雨錄摺

奏報雨水米價並進晴雨錄摺

奏報絲價米價摺

奏報所種御稻收割情形摺

奏報雨水米價並進晴雨錄摺

奏報湖水漫溢田禾淹沒摺

奏報雨水米價並進晴雨錄摺

奏報收割早稻及米價並進晴雨錄摺

奏報米價並進晴雨錄摺

進呈所種御稻摺

奏報米價並進晴雨錄摺

奏報米價並進晴雨錄摺

叩賀歲朝摺

教案史料 續

福建延平美國薛教士被毆案

美欽差西華知照錄送戴領事與閩督糧道交涉延平教案之往來文件照會

光緒庚子辛丑電報續

昇平署崑弋承應戲續

箕疇五福

附錄

文獻館專門委員茶話會議錄

文獻館二十六年六月分工作報告

會考府題奏檔 內閣大庫檔

會考府，雍正元年正月設，專司稽察一應奏銷錢糧事項，特派怡親王允祥，隆科多，白潢，朱軾，會同辦理，三年九月裁撤。案會考府之名，不見於清會典及清史職官志，實錄所記，亦甚簡略，其存留至今之檔案，爲數無多，間有流落外間者。茲選題奏檔一冊，刊入本編。

一

會考府爲欽奉上諭事雍正元年正月十四日奉上諭兵需錢糧除各省地方正項錢糧外一應奏銷其弊甚大若無部費雖當用之項冊檔分明亦以本內數字互異或因銀數幾兩不符來往駁詰不准奏銷一有部費卽糜費錢糧百萬亦准奏銷或僅存駁詰之名將無緊要處借端駁回內外通同將國家錢糧互相欺盜此等情弊甚屬可惡這風習定行整理方好此等盡在皇考睿照之中明知從寬朕今不能如皇考寬容茲後一應錢糧奏銷事務無論何部俱着怡親王舅舅隆科多大學士白潢尙書朱軾會同辦理或用該部堂官司員書

辦或將各部內賢能司員書辦指名取用或酌量另取官員算法人役可以足用永令管辦之處着王大臣四人議奏或有另行用印事件着用總理三庫印信欽此欽遵竊稽查各處錢糧關係甚重請另立衙門設滿漢郎中各二員員外郎各二員主事各三員筆帖式十員俱遴選賢能補用三年無過保題優陞內有歷俸陞轉者仍以陞銜留任書算人等酌定事件繁多召募應役五年考滿咨部卽用以示鼓勵至錢糧除地方正項外其軍需各省動用之項具題到日應准應駁臣等會同該部查核題覆至各部動用錢糧該部定稿奏銷先將一切檔案移送臣衙門查核如支領開銷數目相符臣等列銜會題若有冒銷隱漏情弊立即查參有用印事件卽用總理三庫印信至衙門名色臣等恭擬呈覽懇乞皇上欽定銜署着內務府量其足用撥給一所爲此謹奏伏乞皇上睿鑒施行等因摺奏本日奉旨依議欽此雍正元年三月十四日一咨吏部戶部禮部兵部刑部工部理藩院倉場一劄太常寺太僕寺光祿寺鴻臚寺欽天

二

會考府爲請旨事今設立會考府除地方正項錢糧外其會考軍需錢糧一應奏銷款項甚屬煩多所辦事件若不明白存案日久則無可察考乞將臣衙門分爲左右二司每司給與司印一顆一切檔案俱用司印鈐記俟撥給衙門後令欽天監選擇吉日以便辦事命下之日交與禮部鑄給司印二顆可也爲此謹奏請旨於雍正元年正月二十四日交與奏事郎中常壽等轉奏奉旨是

三

會考府爲請旨事光祿寺移送康熙六十一年九月分給發過內用猪鵝等項照常應用並各處應用等項用過銀兩請銷前來臣等將該寺題定價值查對俱各相符惟有活猪一項內膳房文開三十觔該寺以五十觔開銷文開二十觔該寺以四十觔開銷及究其多銷緣由稱以內膳房交活猪皆除去頭蹄下水計算是以三十觔以五十觔開銷二十觔以四十觔開銷等語事關開銷錢糧相應交與內膳房頭目會同光祿寺將內用活猪觔數定議給發則勒索冒

銷之弊俱可除矣除去年九月以及今年二月交過豬價准其開銷外俟議定之後照依定例遵行可也爲此謹奏請旨於雍正元年三月十七日奏本日奉旨依議雍正元年三月十七日劄光祿寺

四

會考府爲請旨事准工部咨送清江廠五十六年分歲造漕船用過銀兩請銷前來臣等查得開銷造價雖由工部應否准造事隸戶部查清江廠額解料價銀三萬八千餘兩額設漕船二千二百四十隻每年十分抽造一分每造船一隻定價銀二百八兩七錢七分三厘又漕運議單定例開有造船銀兩倘有不敷暫撥蘆課等項銀兩俱先期奏請撥補等語戶部自四十四年起至五十六年止于額解銀兩外漕臣並未題請部內亦未題撥但據咨請卽行撥給道庫淮關銀二十三萬七千兩又非應給之蘆課等項銀兩卽如五十六年除造船用過銀兩外冊內尙報有存剩銀二萬九千餘兩戶部又何得于該年據咨撥給銀二萬四千兩且該年歲造錢糧遲至六十一年始行奏銷而戶部何從知

其不敷又于五十九六十兩年據咨輒行題撥銀六萬四千兩漕運議單旣著有定例從前何以據咨准撥今又何以據咨題撥至于每年准造船數多寡不一部內稱有過號積缺之船是以致有參差若云過號是限滿尙堪應用無庸成造統計十年一週似應少于原額今歷查其准造船數比原額反多二百五十九隻戶部亦止據報冊查核並無歷年底檔可憑核之抵通船數又有旗丁自造之船攙雜在內無可考查伏乞皇上飭令戶部將歷年以來如何據咨准撥後又據咨題撥并過號起自何年旗丁自造之船與該廠歲造之船如何分晰之處逐一先行查覆仍令轉行漕臣將五十七八九六十年歲造錢糧速催題銷到日一併查核可也臣等未敢擅便謹奏請旨於雍正元年三月十七日奏本日奉旨依議雍正元年三月十七日行戶部

五

會考府爲請旨事准工部咨送康熙六十年歲修桃源烟墩等九工宿遷彭家堡等六工山安便益門等十三工三案奏銷前來臣等查得桃源縣烟墩等工

程陞任河臣張鵬翮任內康熙四十一年因黃水異漲歷七十餘日不消各工
危險用過銀六萬三千餘兩以後漸減至二萬八千餘兩自康熙四十七年原
任河臣趙世顯到任以來漸增至六萬餘兩不等宿遷縣彭家堡等工程陞任
河臣張鵬翮任內自康熙四十一年用銀二萬二千餘兩以後漸減至一萬三
千餘兩自康熙四十七年原任河臣趙世顯到任以後漸增至三萬一千五百
餘兩山安便益門等工程陞任河臣張鵬翮任內自康熙四十一年用銀三萬
二千餘兩以後漸減至一萬八千餘兩不等自康熙四十七年原任河臣趙世
顯到任以後漸增至四萬九千餘兩同一工程歷年水勢並無異漲而奏銷錢
糧如何多寡不均有增無減河工錢糧關係重大非親歷河干難以懸定相應
交與工部將康熙六十年分一應未經奏銷河工錢糧事俱交與新任總河齊
蘇勒逐一親歷詳勘據實題銷到日再行奏銷可也爲此謹奏請旨于雍正元
年四月十九日交與奏事員外郎雙全等轉奏本日奉旨依議欽此雍正元年
四月二十日行工部

六

會考府爲請旨事准工部咨送康熙六十年分應用柴炭煤觔等項奏銷一案前來除內庭應用柴炭煤觔俱由內務府具題照數辦送外所有外項應用柴炭煤觔數目將定例併各衙門印文查對俱各相符但查海子等處應用柴炭煤觔舊管紅螺炭有四十二萬三千五百餘觔舊管煤有二十九萬五千九百餘觔舊管黑炭有一百六十八萬七千三百餘觔以上舊管既有如許儘可應用自應將舊管用完再行採買預備而工部何得於六十年又採買紅螺炭五萬觔煤四十萬觔黑炭十萬觔此內非係舊管拖欠卽係糜費錢糧伏乞交與工部將此上舊管煤炭等項有無實在存貯併嗣後作何着落應用之處查明定議具題後再行奏銷可也爲此謹奏請旨於雍正元年四月二十九日交與奏事員外郎雙全等轉奏奉旨交與總理事務王大臣面奏欽此本日總理事務王大臣面奏奉旨依議欽此雍正元年五月初二日行工部

七

會考府爲請旨事准工部咨送康熙六十年分用過錢糧奏銷一案查得此案開除項下有修理文華殿配殿等工所用錢糧係五十七年銷算之項今入于六十年分奏銷又有修理保和殿並苫蓋普仁寺工程所用錢糧係五十九年銷算之項亦入于六十年分奏銷恐有重複之處應行查明又有修理小樣王府工程內磚木等項料價銀數不符之處應行核減但實在項下蓋造護陵房油飾孝東陵及孝惠章皇后喪儀用過錢糧一案又二阿哥各項工程用過錢糧一案又蓋造京通倉廩用過錢糧一案工部旣稱於各案另行奏銷俟題銷時再行查核外查冊內有五十二年經九卿會議自四十年起至五十二年止各商窰舖戶拖欠帶銷銀錢共三十四萬九千二百四十二兩零歷年帶銷過銀錢二萬五千七百六十九兩零又五十八年經九卿會議自五十三年起至五十七年止各商窰舖戶預并遺漏未扣銀錢共六萬三千九兩零又五十九年題參各管工官未經銷算銀錢十萬一千七十八兩零各管工官銷算未繳銀錢六萬一千四百四十四兩零又捐俸養石匹預借未還銀二千五百二十

九兩零又修理通州堤工着落富戶董鄂洛下應還未繳銀二千八兩又着落富戶叢樹萬經名下應還未繳銀一萬二千一百七十一兩以上商密鋪戶及各管工官富戶等拖欠銀錢雖經九卿議定有一九帶銷五厘帶銷者有于月檔扣除者有于各管工官名下勒限追繳者有着落各富戶名下追繳者但所欠甚多所還無幾其中該管之嚴催與不嚴催本身之能完與不能完臣等衙門無憑稽查錢糧關係重大不便久懸相應交與工部將商密鋪戶及各管工官并各富戶所欠錢糧作何完結之處詳加定議具題後再行奏銷可也爲此謹奏請旨等因於雍正元年四月二十九日交與奏事員外郎雙全等轉奏奉旨交與總理事務王大臣面奏欽此本日總理事務王大臣面奏奉旨依議欽此雍正元年五月初二日行工部

八

會考府奏爲欽奉上諭事雍正元年四月十四日奉諭旨各部院司官不論滿洲漢軍漢人郎中員外郎主事論部中官員之多少十人內着保一等一人二

等一人列名具奏欽此查得臣等衙門滿漢郎中員外郎主事共十二員俱係揀選賢能之員現在俱各勉辦事行走若按人數分別等次止可舉出二員因人數甚少臣等並未分別等次通行列名具奏滿郎中色楞額郎中成德員外郎立柱員外郎常存員外郎顧琮主事諾穆圖主事朝陽漢郎中金南鏌員外郎程崙主事吳隆元主事葛斗南主事戴兆佳

九

會考府奏爲欽奉上諭事雍正元年四月二十九日和碩怡親王轉下諭旨各部院筆帖式十人內揀選一等一人二等一人列名具奏欽此查得臣等衙門筆帖式共十員內一等者鑲黃旗筆帖式齊格二等正白旗筆帖式佟泰把此二人列名具奏

十

會考府爲請旨事光祿寺將康熙六十一年十月初一日至初十一至二十兩次十日奏摺呈送臣衙門查核前來查得光祿寺定例凡內用分例以及運

送車輛皆入於十日摺內奏聞至月終仍將三次奏摺內用過物件併外用各項一同繕寫黃冊具本進呈御覽是十日奏摺既仍歸入月奏之內銷算請嗣後十日奏摺聽該寺照例自行具奏後將原摺送臣等衙門收存俟月終具題之日臣等衙門統行考核會題可也俟命下之日遵照施行臣等未敢擅便謹奏請旨雍正元年五月二十一日交與奏事員外郎雙全等轉奏本日奉旨依議雍正元年五月二十二日行文光祿寺